

Chor da giuvenils sin basa privata

Il Chor da giuvenils dalla Scola da musica Surselva vegn menaus vinavon sco chor da project sin basa privata

DA MARTIN CABALZAR

■ **Pigl onn da scola 2007/2008 ha la Scola da musica dalla Regiun Surselva previu d'introducìr in niev sistem d'instrucziun pils scolars da cant ed en quei connex era augmentar considerabla in las taxas. Enviers quell'intenziun ein denton numerus geniturs s'opponi e la finala decidu da menar vinavon il chor da giuvenils sco chor da project sin basa privata.** Il cant da chor che ha ina gronda tradiziun en Surselva para da fascinar era la generaziun giuvna. Fertion che biars chors da carschi han denton empau il teranavos para il cant d'affons e giuvenils da guder ina nova fluriziun. Quei documenteschan buca mo ils chors d'affons da differentas scolas, mobein era il Chor da giuvenils dalla Scola da musica Surselva. Che quei ei aschia ei d'attribuir cunzun alla forza da motivar ed incantar dallas duas capavlas mussadras *Rilana Cadruvi Scherrer* (Schluein) ed *Astrid Alexandre* (Surcasti). Ils treis projects realisai «Da a fin Zuccher», «Ils affons da signur Maculin» ed il «Concert da primavera» presentaus era alla dieta da Europa Cantat a Mustér ha buca pudiu fascinar mo ils rodund 70 affons e giuvenils participai, mobein era incantar il publicum. Ins ha giu formau dus chors, in per affons da 10 tochen 12 onns ed in da giuvenils da 13 tochen 18 onns.

Lecziuns individualas ed augment dallas taxas

Alla fin digl onn da scola 2006/2007 ha il menader dalla Scola da musica Surselva *Claudio Simonet* giu informau ils geniturs dils affons participai dil chor da giuvenils ch'ins vegli bandunar il sistem



Giuvenils cun tschaffen e plascher da cantar han vinavon la pusseivladad da separticipar dil chor da giuvenils.

FOTO G. DEGONDA

da chor da project e porscher persuerter 17 lecziuns jamnilas individualas da cant. Enstagl da 100 francs sco tochen dacheu cuosta la nova purschida 460 francs ad onn. Ton igl augment considerabel dils cuosts sco la midada dil chor da project en lecziuns individualas e l'intenziun da crear in chor da solistas e solists d'elita han levantau malcontentientscha tier giuvenils e geniturs. Era las

duas menadras *Rilana Cadruvi* ed *Astrid Alexandre* han buca saviu s'identificar cun la midada da sistem e la finanziaziun correspundenta e remess lur incumbensa.

Ils geniturs reageschan

Sco quei ch'in dils geniturs *Clemens Appagaus* (Vella) ei s'exprimius enviers LQ seigi l'informaziun davart quella midada

da sistem entras la scola da musica stada ferg munglusa. Malgrad ch'els geniturs pertuccai seigien s'exprimi ton alla sera da geniturs sco en in questunari claramein en favur d'in retuorn al chor da project cun taxas favoreivlas, hagi la scola da musica renviu quels giavischs. Tenor siu avis vegli ins buca promover primarmein vuschs solisticas, mobein dar ad affons e giuvenils cun tschaffen e

plascher da cantar la pusseivladad da cantar en in ensemble vocal. Suenter che la Scola da musica Surselva ha dau canaster per ina tala soluziun han ils geniturs ensem cun *Rilana Cadruvi* decidu da cuntinuar cun quella offerta sin basa privata e cun agid da sponsurs. Fertion che ton l'Uniu cantunala da cant sco il District da cant Surselva hagian attestau lur sustegn spetgi ins aunc adina ina risposta dalla Regiun Surselva.

Preparaziun d'in concert da Nadal cun Rilana Cadruvi

Rilana Cadruvi ha surpriu l'incarica da menar vinavon il chor da giuvenils sco chor da project sin basa privata. La taxa da participaziun resta sin mudests 100 francs, aschia che la participaziun duess buca esser dependenta pli dalla buorsa dils geniturs. Sco quei che *Rilana Cadruvi* ha informau *La Quotidiana* vegn il proxim project ad esser dedicau allas canzuns da Nadal. Ils exercezis vegnan ad entscheiver l'entschatta da settember, ils concerts ein previ pils 8/9 da december. Scolars e giuvenils da 10 entochen 20 onns ch'ei motivai ed han plascher da cantar san s'annunziar entochen la fin d'uost directamein tier la menadra *Rilana Cadruvi*. L'entschatta settember ha allura liug ina orientaziun per affons, giuvenils e geniturs annunziai. Suenter il concert d'advent quenta quenta *Rilana Cadruvi* far ina pausa per motivs familiars per allura saver saver cuntinuar silsuent primavera cul chor da giuvenils cun in niev project.

Annunzia per il project «Canzuns da Nadal» dil Chor da giuvenils dalla Surselva ein da drizzar directamein a *Rilana Cadruvi*. Tel. 081 925 14 63 ni per e-mail: rilana@tele2.ch

■ VUORZ

Survetsch divin dils catschadurs dil Bostg

(lq) Dumengia, ils 26 d'uost ha liug sila ruina dil Munt Sogn Gieri il survetsch divin campester. La secziun dil Bostg, l'uniu dils catschadurs da Siat, Rueun, Pigniu, Andia e Vuorz envida ad ina festivitad ecumena cun accompignament musical. Il survetsch divin ha liug allas 11.00, en cass da macort'aura ella baselgia da Vuorz.

Individualisar l'instrucziun

La Scuntrada e formaziun Surselva ha purschiu l'emprema ga jamnas d'emprander

■ **(sib) Cun jamnas d'emprander intensivas dat la Scuntrada e formaziun Surselva (SFS) la pusseivladad ad affons e giuvenils da migliurar lur prestaziuns en scola. Quell'instrucziun supplementara duei promover mintga scolar a moda individuala.** Meglieras notas entras sepreparar optimalmein sil niev onn da scola e repeter la materia digl onn vargau. Quei ei il motto dallas jamnas intensiv d'emprander che la SFS porscha questa stad l'emprema ga a Laax en Casa de Mont. Per quei intent ha la SFS engaschau las studentas *Marina Blumenthal* e *Patrizia Brugger* dalla Scol'aula da pedagogia a Cuera. Ellas sustegnan giuvenils dil scalam ault ed affons dalla 5avla e 6avla classa che han difficultads en matematica, geometria, tudestg ni romontsch.

Pestalozi ei vargau

Il concept didactic da quell'instrucziun supplementara seigi tut in auter che quel da Pestalozi, puntuescha *Martin Mathiuet*, il menader dalla SFS. Enstagl che tuts emprendien ensem la medema materia mettien els peisa sin in'instrucziun individuala per mintg'affon. «Ozil di vegn mintga scolar cun in auter sacados en scola. Per quei eis ei essenzial che nossas scolastas adatteschen lur instrucziun als basegns individuals da mintga affon», declara *Martin Mathiuet*. Per quei han las duas futuras scolastas sclariu ordvau il giavischs da mintga scolar e sviluppu per mintgin in program individual. Las scolastas sorprendien la rolla d'accumpignader pigl affon. *Martin Mathiuet*: «Entras quei gioga il scolar la rolla principala. Igl affon porta denton era la responsabladad d'emprander quei ch'el drova.»



La futura scolasta *Marina Blumenthal* (seniester) instruescha ils participants dallas jamnas d'emprander a moda individuala.

FOTO S. BUNDI

Emprander per la piazza da siemi

Ils affons ch'ei s'annunziai pigl emprem cuors d'emprander intensiv san pertgei ch'els ein a Laax. Els lavuran concentrat e ruasseivel. Miserias cun la disciplina ni buobanaglia buca motivada paran *Marina Blumenthal* e *Patrizia Brugger* buca d'enconuscher. Ina che fa voluntariamein scola la stad ei *Anina Gujan* da Flem. Ella seigi buca aschi sperta en matematica, tradescha la buobad endisch onns. Ultra da quei embli di ella pil solit sur stad bia da quei ch'els hagian empriu en scola. Entras quei cuors sperti ella ch'ei mondi pli tgunsch d'entscheiver puspei d'atun la scola. In'otra scolara dalla scola reala havess bugin fatg in emprendissadi mercantil.

Il patrun ha tschentau la cundiziun ch'ella cumpenseschi la materia che maunchi. La scolara ha tschentau ensem in program da deficit ed ha elaborau la materia el rom dallas jamnas d'emprander intensiv a Laax.

Ina da biaras purschidas

La necessitad da lantschar ina tala purschida seigi stada avon maun ella regiun, di *Martin Mathiuet*. Tenor el schazegian ils geniturs era ch'els san plazzar ils affons igl entir di. «Mo ina garanzia als geniturs che lur affon emprendi exact ton e ton savein nus secapescha buca dar», concede el. Il fatg che 14 affons e giuvenils ein s'annunziai valetescha el sco success. Quei success gida era a segirar l'existen-

za dalla SFS. Dapi entgins onns ei l'organisasiun puspei sin fermas combas, quei suenter ch'igl ei reussiu da sorprender cuors da tuttas sorts per instituziuns publicas e privatas. Aschia porscha la SFS oz cuors da lungatg per las Ovras da Domat aschibein sco cuors da formaziun per disoccupai per l'Intermediaziun da lavur regiunala. «La finala lein nus sco organizaziun senza profit augmentar cun la purschida dalla SFS l'attraktivitad dalla regiun», puntuescha *Martin Mathiuet*. Per quei ha la SFS gia planisau per la stad 2008 las proximas jamnas d'emprander.

Ulteriuras informaziuns sut www.scuntradasurselva.ch.

LA QUOTIDIANA

Editor: Hanspeter Lebrument

Directur: Andrea Masüger

Schefredacziun:

Martin Cabalzar, schefredactor (mc)
Gieri Antoni Caviezel, substitut/producent (gac)

Redacziun:

Augustin Beeli (abc), Andreas Cadonau (ac),
Erwin Caduff (ec), Giuseppe Venzin (gv).

Collavuraturas redacziunalas:

Susi Bearth (sb), Gabi Degonda (gd), anr.

Adressas:

redacziun centrala:
La Quotidiana, Via centrala 4, 7130 Glion,
tel. 081 920 07 10, fax 081 920 07 15.

E-mail: redaktion-lq@suedostschweiz.ch
Sutselva/Renania: La Pünt, 7433 Donat,
tel. 081 630 70 53, fax 081 630 70 51.

Editura Südostschweiz Presse AG,

Via dalla caserna 1, 7007 Cuira;

tel. 081 255 50 50, fax 081 255 51 00

Manader da l'editura: Beat Ravaioli

Servetsch d'abunents e da distribuziun:

tel. 0844 226 226, E-Mail abo@suedostschweiz.ch

Inserats

Südostschweiz Publicitas AG,

Via centrala 4, 7130 Glion

tel. 081 920 07 17, fax 081 920 07 18,

E-mail: ilanz@so-publicitas.ch

La Quotidiana cumpara tschintg giadas ad emna
Ediziun: «Die Südostschweiz»: 139 568 exemplars.

Communicaziun da participaziuns considerablas
sin fundament da art. 322 CP:
Südostschweiz Radio/TV AG, Südostschweiz
Pressevertrieb AG, Südostschweiz Grischacom AG.

Südostschweiz Presse AG